

Fikret Ahmetbašić

## Izumrle i raseljene familije u Džakulama od 1932-2000. godine

U traganju za nekim etnološkim zanimljivostima sa područja današnje Mjesne zajednice Džakule prelistao sam i domovnicu iz 1932. godine u kojoj je izvršen popis stanovništva i primijetio da 17 familija više ne živi u ovom selu. Radi se o sljedećem familijama: Bešići, Biberkići, Begići, Huskanovići, Okići, Fačići, Piskići, Hamzići, Husići, Softići, Okanovići, Turnadžići, Spahići, Džambići, Drndići, Dželimlovići i Jašarevići. Neke od ovih familija su izumrle, a neke su se tokom vremena iselile iz Džakula i nastavile da žive u susjednim ili nekim drugim mjestima.

Pokušavajući da bar približno utvrdim šta je bilo sa tim familijama, koristio sam se domovnicom iz 1932. godine i bilježio kazivanja najstarijih mještana koji su mi pružili dosta zanimljivih informacija o tim familijama. Posebnu zahvalnost dugujem "svojim kazivačima" Osmanu Ibričiću i Rami Smajloviću.

Za svaku od tih familija prikupio sam nekoliko osnovnih podataka koji mogu biti zanimljivi za one njihove potomke koji žele saznati "ko su, što su i odakle su" i istovremeno poslužiti kao osnova za neka šira etnološka istraživanja na ovom području.

### BEŠIĆI

U periodu oko 1920. godine u Džakulama su živjela braća Hasan i Bego Bešić, koji su, prema kazivanju Beginog sina Mustafe, u Džakule došli iz Sokola. Hasan nije imao muških potomaka. Kćerka Kada "našla mu se" (rođena) 8.6.1918. godine - i danas živa.

Bego je imao tri sina: Agana, Redžu i Mustafu. Agan je odselio "na ženevinu" u Prijeko Brdo 1940. godine i tamo izrodio potomstvo koje danas ima više muških "izdanaka". Redžo je bio duševni bolesnik i nije ostavio potomstvo, dok su iza Mustafe ostale 4 kćeri. Danas je Mustafina kćerka Rabija jedini živi član ove familije u Džakulama.

### BIBERKIĆI

Ahmet Biberkić, rođen 1874. godine doselio je u Džakule iz Donje Međide. Bio je oženjen iz Škahovice. Po kazivanju Osmana Ibričića, žena mu se zvala Šaha. Nisu imali djece pa je ova familija tako izumrla.

### BEGIĆI

Jedino se zna za nekog Begić Ibrahima, za kojeg kazivači kažu da je živio sam, bez porodice. I potomstva. Ne zna se je li to bio jedini Begić u Džakulama.

### HUSKANOVIĆI

Familija Alage Huskanovića (rođen 1894), po kazivanjima starijih mještana, tačnije Osmana Ibričića i Rame Smajlovića, živjela je u Džakulama do 1940. godine. Isti kazivači tvrde da mu se otac Osman zvani Oman doselio se iz Doborovaca još za vrijeme stare Jugoslavije. Njegova majka Zlata (rođena 1878. godine, a umrla 10.1.1939. godine) ukopana je na vlastitoj zemlji, koja se i danas zove Alagina krčevina i tretira kao javna površina. Alaga imao sina Omera (rođen 4. 5.1925.) i kćerku Eminu (rođena 1923. godine), koji i danas žive u Moranjcima sa svojim mnogobrojnim potomcima.

### OKIĆI

Po popisu stanovništva iz 1932. godine, u ovoj familiji živjela su samo dva brata Zejćir (rođen 1877. - umro 1.6.1940) i Sinan (rođen 1882. - umro 1. 11. 1943). Nijedan od njih nikada se nije ženio, pa je i ova familija izumrla.



### **FACIĆI**

Prije otprilike 110 godina u ovoj porodici živjela su braća Halil i Omer. Halil nije imao muških potomaka. Iza njega je ostala samo kćerka Džiha, koja se udala za Hadži Kasima Halilovića. Omer je imao tri sina: Ibrahima, Osmana i Rahmana. Ibrahim i Osman (koji se nije vratio sa odsluženja vojnog roka) nisu imali potomaka, dok je Rahman, koji će kasnije postati hadžija, imao tri kćeri. Hadži Rahman je umro 31.5. 1997. godine kao posljednji muški potomak porodice Facića. Njegovom smrću i ova porodica je potpuno izumrla.

### **PISKIĆI**

Posljednji potomak ove porodice u Džakulama bio je Osman Piskić Piraga. Rođen je 1880. godine, a umro 25. 7. 1955. godine. Prema sjećanju kazivača, doselio je iz Doborovaca i živio sam, bez porodice. Bio je poznat kao narodni ljekar, bavio se izlivanjem strava, spaljivanjem crvenog vjetra, sjećanjem dalka... Današnji Piskići, koji žive u Doborovcima vjerovatno su njegovi dalji rođaci.

### **HAMZIĆI**

Prilikom popisa stanovništva 1932. godine u Džakulama je popisana i porodica Osmana Hamzića, koji je rođen 1.4.1900. godine. Živio je u Trnovcima sa ženom Čerimom (rođena 1913. godine) i sinom

Mehmedom (rođen 29.7.1955. godine), koji je imao ženu Ajšu. Nije poznato da li su izumrli ili su se negdje odselili, kao što nije poznato ni odakle su došli u Džakule.

### **HUSIĆI**

Nije poznato kada je umro posljednji potomak ove porodice u Džakulama Mujo Husić, (rođen 16. 10. 1893. godine). Njegova prva žena zvala se Hanifa (rođena 1895. godine, umrla 6.4.1959. godine), a druga Fatima, kći Rame Ibrićića, koju je oženio 1910. godine. Umrla je 4.4.1945. godine. Njezin brat Osman i danas živi u Džakulama, ali ni on nema muških potomaka. Mujo je imao i sestru Ajšu, koja je rođena 7.10.1908. godine, ali nije poznato da li ima potomke i gdje je živjela.

### **SOFTIĆI**

Kazivači pouzdano znaju da je u Džakulama prije 1952. godine živio Alija Softić i da je imao kuću pod šumom Sječarom. Iz domovnice se vidi da je umro prije 1932. godine. Njegova supruga Ajiša rođena je 1884. godine. Imali su kćerku Beharu i sina Jusufa. Behara je rođena 26. 7. 1917. godine. Udala se u selo Moranjke i zna se da je imala djece. Alijin sin Jusuf, rođen 3. 7. 1925. godine, nije se vratio sa odsluženja vojnog roka, tako da je i ova porodica izumrla. Da li su ovi Softići bili u rodstvu sa današnjim Softićima, koji žive u Trnovcima nije poznato.

### **OKANOVIĆI**

Prema kazivačima, oko 1925. godine doselio se Šerif Okanović iz Doborovaca. Rođen je 15. 5. 1907. umro 4. 4. 1934. godine. Sa ženom Hatidžom (rođena 1.5.1914) nije imao djece, pa je tako i ova porodica izumrla. Hatidža se 29. 1. 1955. godine preudala za Saliha Piragića u Sladnu.

### **SPAHIĆI**

Posljednji muški potomak familije Spahić bio je Mehmed Spahić zvani Mehica, rođen 1868. godine. Iako je živio sa dvije žene, iza sebe nije ostavio potomstvo. Jedna njegova žena zvala se Emina (rođena 1875. a umrla 10. 5. 1937. godine), a druga Mejra (rođena 1877. godine u Donjoj Zelinji u porodici Halilčević). Ovaj Spahić imao je dvije sestre: Hanku i Hatu. Potomke po ženskoj liniji ima u familijama Šerbečića i Kulovića.

### **DŽAMBIĆI**

U domovnici iz 1932. godine stoji da je u Džakulama živjela i familija Džambića. Popisana je porodica Mustafe Džambića, koji je rođen 1885. godine. Popisani su i njegovi bratići Hasan, Mujo i Selim. Najvjerovatnije su odselili u Gračanicu, pošto je Mustafa, po priči kazivača Osmana Ibričića, tamo imao udatu sestru.

### **DRNDIĆI**

Osman Drndić (rođen 1879) posljednji je nosilac ove familije u Džakulama. Imao je suprugu Nazu (1882), sina Kasima (1914.) te kćeri Mejru (1912) i Havu (1921). Od tih Drndića, u Džakulama živi jedino Hava, koja ima 79 godina. Drndići koji danas žive u Prijekom Brdu potiču iz Džakula (Trnovci) i sa ovom porodicom najvjerovatnije su srodstvu.

### **DŽELILOVIĆI**

Popisom iz 1932 godine obuhvaćene su i dvije porodice Dželilovića, Omera (1877) i Bajre (1886). Bajro je imao ženu

Hanku (1889), rođenu Šahdanović i sina Emina rođenog 16.4.1940. godine. Odselili su iz Džakula poslije Drugog svjetskog rata i njihovi potomci danas žive u Gračanici. Kazivači pamte Aliju Dželilovića, koji je odselio u Gračanicu. Parcela na kojoj su živjeli i danas nosi ime Dželilovac. Grob Bajre Dželilovića nalazi se na Pločama pored prijekog puta Džakule - Sahratlje - Bukva preko Visoke vode i ljudi na njemu ostavljaju sadaku.

### **JAŠAREVIĆI**

Posljednji Jašarevići u Džakulama bili su iz porodice Begana Jašarevića, koji su živjeli u mahali Mehmedovići. Began je imao sinove Agana i Ahmeta i kćerku Havu. Žena mu se zvala Džama, rođena u Donjoj Međedi. Imala je i kćerku Kadiru iz drugog braka. Oba Beganova sina odselili su u Gračanicu. Agan je napravio kuću na Bahićima, gdje je i umro 1997. godine. Njegov sin Mustafa (iz prvog braka) danas živi sa majkom na Srnicama. Drugi sin Ahmet nema potomstva jer se nije ni ženio.

### **TURNADŽIĆI**

U Domovnici i popisu iz 1932. godine nalazimo porodicu Mehmeda Turnadžića, koji je rođen 5.5.1911. a umro 22.7.1939. godine. Imao je brata Osmana i sestru Hasibu. Niko od kazivača ne zna ništa o ovoj familiji. Pretpostavlja se da su se iz Džakula odselili u Biberovo Polje (opština Gradačac), gdje je sve do 1976. godine živjela porodica Osmana Turnadžića, kojeg su još zvali Alija. Njegova dva brata Fehim i Mujaga žive u Brčkom, Osmanov sin Zaim živi u Banovićima.

Nije utvrđeno da li je ova familija u srodstvu sa spomenutim Mehmedom iako se zbog blizine ovih mjesta (4 km) tako nešto može tvrditi. Pomenutog Aliju zvali su Alija Sarajlijin jer je tvrdio da se njegov djed doselio u ove krajeve iz Sarajeva.